

REGLUGERÐ

fyrir Lífeyrissjóðinn Hlíf.

1. gr.

Nafn sjóðsins og heimili.

- 1.1. Sjóðurinn heitir Lífeyrissjóðurinn Hlíf. Heimili hans og varnarþing er í Reykjavík.

2. gr.

Hlutverk sjóðsins.

- 2.1. Hlutverk sjóðsins er að tryggja sjóðfélögum, eftirlátnum mökum þeirra og börnum lífeyri eftir þeim reglum sem hér fara á eftir.

3. gr.

Sjóðfélagar.

- 3.1. Sjóðfélagar skulu vera þeir félagar Vélstjórafélags Íslands og Skipstjóra- og stýrimannafélagsins Öldunnar, sem samkvæmt kjarasamningum félaganna eru tryggð lífeyrisréttindi og ekki eru stöðu sinnar vegna, í öðrum lífeyrissjóði, sem stofnaður er með lögum eða viðurkenndur af fjármálaráðuneytinu.
- 3.2. Stjórn sjóðsins er heimilt að taka í tölu sjóðfélaga aðra starfsmenn þeirra fyrirtækja, sem tryggja starfsfólk í sjóðnum, svo og aðra starfshópa, enda telji hún ekki þátttöku þeirra brjóta í bága við hagsmuni sjóðfélaga skv. 1. málsg. r.
- 3.3. Heimilt er sjóðfélaga, sem gerist sjálfstæður atvinnurekandi, að halda áfram þátttöku í sjóðnum, þá skal atvinnurekanda í hlutaðeigandi starfsgreinum heimilt að gerast sjóðfélagi.
- 3.4. Stjórn sjóðsins er heimilt að leyfa Vélstjórafélagi Íslands og Skipstjóra- og stýrimannafélaginu Öldunni, að tryggja í honum þá starfsmenn sína, sem ekki eiga aðild að öðrum lífeyrissjóðum.
- 3.5. Þeir sem njóta elli- og örorkulífeyris úr sjóðnum, teljast sjóðfélagar. Einnig þeir sem greitt hafa í sjóðinn í 25 ár eða eiga 25 stig í sjóðnum, en eru hættir inngreiðslum.
- 3.6. Stjórn sjóðsins er heimilt að semja við stjórnir annarra lífeyrissjóða um samruna þeirra við sjóðinn. Stjórnin skal gæta þess að áunninn réttur sjóðfélaga sjóðsins verði ekki skertur við samrunann og jafnframt að hann sé ekki bættur á kostnað sjóðfélaga hinna sjóðanna.
- 3.7. Þeir sem greiða til séreignardeildar eru sjóðfélagar þeirrar deildar. Um réttindi þeirra og skyldur gilda ákvæði 15. greinar.

4. gr.

Stjórn sjóðsins.

- 4.1. Stjórn sjóðsins skal skipuð fimm mönnum, tveimur tilnefndum af stjórn Vélstjórafélags Íslands, einum tilnefndum af stjórn Skipstjóra- og stýrimannafélagsins Öldunnar og tveimur kosnum óhlutbundinni kosningu af sjóðfélögum. Jafnmargir varamenn skulu skipaðir á sama hátt.

- 4.2. Kjörtímabil stjórnarmanna skal vera 4 ár. Fyrsta fjögurra ára kjörtímabil fulltrúa Vélstjórafélags Íslands og Skipstjóra- og stýrimannafélagsins Öldunnar hefst að hálfnuðu kjörtímabili þeirra stjórnarmanna sem sjóðfélagar kjósa, þ.e. eftir aðalfund 1985.
- 4.3. Stjórnin skiptir sjálf með sér verkum. Stjórnin skal halda gerðabók og rita í hana allar samþykktir sínar. Til þess að samþykkt sé lögmæt þurfa þrír stjórnarmenn að greiða henni atkvæði.

5. gr.

Ársfundur.

- 5.1. Ársfund lífeyrissjóðsins skal halda fyrir lok júní ár hvert og hefur hann æðsta vald í málefnum sjóðsins. Fundurinn skal auglýstur í útvarpi og a.m.k. einu dagblaði með minnst 4 daga fyrirvara. Heimilt er að boða til aukaársfundar sem heimild hefur til reglugerðarbreytinga. Skal hann boðaður á sama hátt.
- 5.2. Á ársfundi skal taka fyrir eftirfarandi: Gerð skal grein fyrir skýrslu stjórnar, ársreikningum, tryggingafræðilegum úttektum, fjárfestingarstefnu sjóðsins og tillögum stjórnar til breytinga á reglugerð sjóðsins. Þá skal ársfundurinn ennfremur taka ákvörðun um laun stjórnar.

6. gr.

Rekstur og innra eftirlit.

- 6.1. Sjóðurinn skiptist í tvær deildir, samtryggingardeild og séreignardeild. Deildirnar eru reknar sameiginlega og skipta með sér kostnaði í hlutfalli við umfang hvorrar deildar, samkvæmt reglum sem sjóðurinn setur.
- 6.2. Reikningsár sjóðsins er almanaksárið. Stjórnin ræður endurskoðanda sem jafnframt gegnir eftirlitshlutverki með sjóðnum samkvæmt lögum.

7. gr.

Tryggingafræðileg athugun.

- 7.1. Stjórn lífeyrissjóðsins skal árlega fá tryggingafræðing til að reikna út fjárhag sjóðsins og skal niðurstaða athugunarinnar vera hluti af reikningsskilum sjóðsins fyrir hvert starfsár.
- 7.2. Í niðurstöðu tryggingafræðilegrar athugunar skal gera grein fyrir kostnaði vegna þeirra lágmarksréttinda, sem sjóðurinn er skuldbundinn til þess að veita. Einnig skal gerð grein fyrir kostnaði vegna þeirra viðbótarréttinda sem sjóðurinn kann að veita umfram ofangreint lágmark.
- 7.3. Telji tryggingafræðingur með hliðsjón af ávöxtun, aldursdreifingu sjóðfélaga og öðrum atriðum, sem máli skipta, rannsókn sína leiða í ljós, að fjárhagur sjóðsins sé svo ótryggur, að við svo búið megi ekki standa, skal hann gera tillögur um hlutfallslega lækkun réttinda, ef ekki finnast aðrar leiðir til þess að rétta hag sjóðsins. Leiði rannsókn hins vegar í ljós, að hagur sjóðsins sé svo góður að hægt sé að auka réttindin, skal tryggingafræðingur gera tillögur um hækkun réttinda. Ekki skal þó gera tillögur til hækkunar eða lækkunar á einstökum lífeyristegundum, nema frávík sé orðið meira en 5% til lengri tíma litið.

8. gr.

Ávöxtun fjár sjóðsins.

- 8.1. Stjórn sjóðsins sér um ávöxtun á fé hans og er skylt að ávaxta það á sem bestan hátt að teknu tilliti til öryggis og áhættu.
- 8.2. Í skuldabréfum aðildarríkja OECD.
- 8.3. Í skuldabréfum sem tryggð eru með ábyrgð ríkissjóðs eða stofnana ríkis og/eða sveitarfélaga.

- 8.4. Í bönkum og sparisjóðum.
- 8.5. Í skuldabréfum tryggðum með veði í fasteignum, enda sé þess gætt að fjárhæð skuldabréfs, að meðtöldum þeim veðskuldum sem framar standa, sé innan við 65% af brunabótamati fasteignar eða markaðsvirði, sé það álitid lægra.
- 8.6. Í skuldabréfum banka, sparisjóða, sveitarfélaga, fjárfestingarlánasjóða, svo og annarra lánastofnana en að framan greinir, sem starfa á grundvelli laga eða njóta viðurkenningar Seðlabanka.
- 8.7. Í skuldabréfum, sem skráð eru á Verðbréfaþingi Íslands eða á verðbréfaþingum aðildarríkja OECD, sem samþykkt eru af þarlandum yfirvöldum.
- 8.8. Í hlutabréfum sem skráð eru á Verðbréfaþingi Íslands eða skráðum verðbréfaþingum í aðildarríkjum OECD. Einnig má kaupa í óskráðum innlendum fyrirtækjum, en sá hluti má ekki fara umfram 10% af heildareign að því tilskyldu að sjóðurinn eigi fyrir skuldbindingum.
- 8.9. Í hlutdeildarskírteinum verðbréfasjóða sem samþykktir eru af yfirvöldum viðkomandi ríkis.
- 8.10. Í verðbréfum sem ætlað er að verja eignir sjóðsins gagnvart öðrum myntum, vaxta-sveiflum og öðrum breytingum sem taldar eru getað ógnað ávöxtun sjóðsins.

9. gr.

Iðgjöld.

- 9.1. Iðgjöld til sjóðsins nema 10% af öllum launatekjum starfsmanna, hverju nafni sem þær nefnast og ber að gera skil á þeim mánaðarlega. Gerður er sá fyrirvari að kjarasamningar viðkomandi sjóðfélaga heimili þetta. Nú eru laun greidd vikulega og skal þá mánaðarlegt uppgjör miðast við þær vikur, 4 eða 5, sem lýkur í mánuðinum. Sé um launþega að ræða skiptist gjaldið þannig að launþegi greiðir 4% en vinnuveitandi 6%. Stjórn sjóðsins setur reglur um við hvaða tekjur skuli miða iðgjöld þeirra sjóðfélaga sem gerast atvinnurekendur eða stunda sjálfstæða vinnu við inngöngu í sjóðinn svo og þeirra sem hún veitir heimild til þátttöku.
- 9.2. Launagreiðanda ber að halda iðgjöldum launþega eftir af launum hans og standa sjóðnum skil á þeim mánaðarlega ásamt eigin iðgjaldahluta. Gjaldalagi iðgjalda hvers mánaðar er 10. dagur næsta mánaðar. Eindagi skal vera síðasti dagur sama mánaðar og iðgjald fellur í gjalddaga. Verði vanskil skulu iðgjöld innheimt með vanskilavöxtum frá gjalddaga.
- 9.3. Réttindi vegna aukaframlaga í lífeyrissjóðinn umfram reglubundin framlög skulu reiknuð miðað við greiðsludag. Sams konar skylda hvílir á launagreiðanda varðandi aukaframlög að því er varðar innheimtu og skil á iðgjaldi eins og getið er í grein 9.2.
- 9.4. Sjóðfélagar bera ekki ábyrgð á skuldbindingum sjóðsins með öðru en iðgjöldum sínum.

10. gr.

Grundvöllur lífeyrisréttinda.

- 10.1. Samanlögð iðgjöld sjóðfélaga hvert almanaksár skulu umreiknuð í stig, er mynda grundvöll lífeyrisréttinda hans.
- 10.2. Til grundvallar stigaútreikningi skal reikna fyrir hvern almanaks mánuð fast mánaðar-kaup miðað við dagvinnu, skv. 1. launaflokki samnings Vélstjórafélags Íslands, um kaup og kjör vélstjóra í Áburðarverksmiðjunni, Sementsverksmiðjunni og hjá Landsvirkjun miðað við hæsta starfsaldur. Frá 1. janúar 1994 voru grundvallarlaun sjóðsins fastsett kr. 96.000 á mánuði skv. tillögu tryggingafræðings sjóðsins til ársloka 1995.

Frá og með 1. janúar 1996 skulu þau taka mánaðarlegum breytingum skv. vísitölu neysliverðs. Verði grundvöllur þessi að dómi sjóðstjórnar ónothæfur mælikvarði, skal hún ákvarða annan stigagrundvöll, svo og tengingu hans við fyrri grundvöll. Sama gildir ef stigagrundvöllur sem ákveðinn hefur verið af sjóðstjórn reynist síðar ónothæfur.

- 10.3. Stig ársins reiknast þannig, að deilt skal í 10-föld iðgjöld, sem greidd hafa verið vegna hlutaðeigandi sjóðfélaga, með grundvallarlaunum ársins samkvæmt 2. málsgrein þessarar greinar (10.2).
- 10.4. Ekki skal reikna stig fyrir tíma eftir lok þess mánaðar er sjóðfélagi nær 70 ára aldri.
- 10.5. Stig skulu reiknuð með þremur aukastöfum.
- 10.6. Verði iðgjöld ekki umreiknuð í stig, sbr. 4. málsgr. þessarar greinar, fer um endurgreiðslu þeirra eftir ákvæðum 17. gr.

11. gr.

Ellilífeyrir.

- 11.1. Hver sjóðfélagi sem orðinn er fullra 67 ára að aldri, á rétt á ellilífeyri úr sjóðnum.
- 11.2. Upphæð ellilífeyris er hundraðshluti af grundvallarlaunum, eins og þau eru 1. dag hvers mánaðar sem lífeyrir er greiddur og nemur hundraðshluti þessi samanlögðum stigafjölda, sem sjóðfélagi hefur áunnið sér margfölduðum með 1,48.
- 11.3. Heimilt er sjóðfélagi að fresta töku lífeyris til 70 ára aldurs og hækkar þá upphæð ellilífeyris vegna réttinda, sem áunnin voru fram til 67 ár aldurs, um 0,6% fyrir hvern mánuð sem töku hans er frestað.
- 11.4. Haldi sjóðfélagi áfram að ávinna sér réttindi, eftir að hann hefur hafið töku ellilífeyris, er heimilt eftir hverja 12 mánuði að bæta áunnum réttindum við áður ákvarðaðan rétt hans og gildir þetta til 70 ára aldurs.

12. gr.

Örorkulífeyrir.

- 12.1. Hver sjóðfélagi, sem greitt hefur iðgjöld til sjóðsins a.m.k. 6 mánuði á undanfarandi 12 mánuðum á rétt á örorkulífeyri, ef hann verður fyrir orkutapi, er tryggingayfirlæknir metur 50% eða meira. Örorkumat þetta skal aðallega miðað við vanhæfni sjóðfélaga til að gegna starfi því, er hann hefur gegnt og aðild hans að sjóðnum er tengd. Þrátt fyrir örorku á enginn rétt á örorkulífeyri, meðan hann heldur fullum launum fyrir annað starf, sem veitir lífeyrissjóðsréttindi, og aldrei skal lífeyrir vera hærri en sem nemur þeim tekjumissi, sem sjóðfélaginn hefur sannanlega orðið fyrir, sökum örorkunnar.
- 12.2. Hámark örorkulífeyris miðast við áunnin lífeyrisrétt samkvæmt 10. gr. að viðbættum lífeyri, er svarar til þess stigafjölda, sem sjóðfélaginn hefði áunnið sér fram til 67 ára aldurs, miðað við meðaltal stiga hans næstu þrjú almanaksárin fyrir orkutapið eða meðaltal stiga þann tíma, er hann hefur verið í sjóðnum, ef sá tími er skemmri en þrjú ár. Telji sjóðstjórnin þetta þriggja ára meðaltal vera sjóðfélaganum óhagstætt vegna sjúkdómsforfalla, eða atvinnuleysis, er henni heimilt að leggja til grundvallar meðaltal stiga fleiri ár aftur í tímann. Eigi sjóðfélaginn jafnframt rétt á örorkulífeyri úr öðrum sjóði, skal hann því aðeins fá lífeyri úr þessum sjóði vegna ókomins tíma, að hann hafi síðast greitt iðgjöld til þessa sjóðs. Ef rekja má orkutapið til ofnotkunar áfengis, deyfieða fíknilyfja, skal ekki reikna réttindi vegna ókomins tíma.
- 12.3. Örorkulífeyrir er sami hundraðshluti af hámarksörorkulífeyri og orkutapið er metið, sbr. þó 1. málsgr.

- 12.4. Skylt er öryrkja, sem sækir um örorkulífeyri úr sjóðnum eða nýtur slíks lífeyris, að láta stjórn sjóðsins í té allar þær upplýsingar um heilsufar sitt og atvinnutekjur, sem nauðsynlegar eru til að dæma um rétt hans til lífeyris.
- 12.5. Stjórn sjóðsins skal lækka eða fella niður örorkulífeyrir þeirra öryrkja, sem fá starfsorku sína aftur að nokkru eða öllu leyti. Sömuleiðis ber henni að hækka örorkulífeyrinn, ef örorkan vex til muna og án sjálfskaparvíta frá því, sem hún var metin við fyrri ákvarðanir, enda hafi sjóðfélaginn á þeim tíma er örorkan óx, ekki verið í starfi, er veitti honum lífeyrisréttindi í öðrum lífeyrissjóði.
- 12.6. Örorkulífeyrir fellur niður við 67 ára aldur. Ellilífeyrir skal þá ákveðinn þannig, að auk áunninna stiga skal reikna að þeim hluta, er hundradshluti örorku segir til um, stig sem við úrskurð um örorkulífeyri voru reiknuð sjóðfélaganum fram til 67 ára aldurs. Aldrei skal þó slík viðbót við áunnin stig vera meiri en svo, að heildarstigafjöldi hvert almanaksár verði hærri en almennt tíðkast í starfsgrein hlutaðeigandi sjóðfélaga.

13. gr.

Makalífeyrir.

- 13.1. Nú andast sjóðfélagi, sem naut elli- og örorkulífeyris úr sjóðnum eða greitt hafði iðgjald til hans a.m.k. 6 mánuði á undanfarandi 12 mánuðum og á þá maki hans rétt til lífeyris úr sjóðnum á meðan skilyrði skv. greinum 13.2., 13.3. og 13.4. eru uppfyllt, þó skal óskertur makalífeyrir ætíð greiddur í minnst 36 mánuði og 50% makalífeyrir í 24 mánuði til viðbótar.
- 13.2. Maki sjóðfélaga er fæddur fyrir 1945. Þó skal makalífeyrir samkvæmt 4. tölulið skerðast um 2% fyrir hvert ár, sem makinn er fæddur eftir 1. janúar 1925 og um 2% að auki fyrir hvert ár sem maki er fæddur eftir 1. janúar 1930 og um 2% að auki fyrir hvert ár sem maki er fæddur eftir 1. janúar 1935 og um 2% að auki fyrir hvert ár sem maki er fæddur eftir 1. janúar 1940.
- 13.3. Yngsta barn sjóðfélaga er 22 ára eða yngra og á framfæri maka.
- 13.4. Maki sjóðfélaga er að minnsta kosti 50% öryrki. Hlýtur hann þá lífeyri úr sjóðnum, sem er sami hundradshluti af makalífeyri samkvæmt 5. tölulið þessarar greinar og örorkutap hans er metið.
- 13.5. Upphæð makalífeyris er hundradshluti grundvallarlauna og nemur hundradshluti þessi samanlögðum stigafjölda hins látna sjóðfélaga að viðbættum framreikningi til 67 ára aldurs margfölduðum með 0,74, sbr. gr. 12.2.
- 13.6. Réttur til makalífeyris fellur niður ef makinn gengur í hjónaband á ný eða stofnar til sambúðar, sem jafna má til hjúskapar, en gengur aftur í gildi, ef síðara hjónabandinu eða sambúðinni er slitið án réttar til lífeyris.
- 13.7. Nú andast sjóðfélagi og lætur ekki eftir sig maka og er þá stjórn sjóðsins heimilt að greiða lífeyri samkvæmt 1. mgr. þessarar greinar um lengri eða skemmri tíma til aðila sem sannanlega hefur annast heimili hans um langt árabíl fyrir andlát hans.

14. gr.

Barnalífeyrir.

- 14.1. Nú andast sjóðfélagi, sem greitt hefur iðgjöld til sjóðsins eða notið úr honum örorkulífeyris a.m.k. 6 mánuði á undanfarandi 12 mánuðum, og eiga þá börn hans og kjörbörn, er hann lætur eftir sig og yngri eru en 18 ára, rétt á lífeyri úr sjóðnum til 18 ára aldurs. Veiti fráfall sjóðfélagans börnunum jafnframt rétt til lífeyris úr öðrum lífeyrissjóði, skal lífeyrir úr þessum sjóði þó bundinn því skilyrði, að sjóðfélaginn hafi síðast greitt iðgjöld til þess sjóðs.

- 14.2. Fullur barnalífeyrir vegna fráfalls sjóðfélaga er kr. 7.500 með hverju barni fyrir hvern almanaksmánuð og breytist í hlutfalli við breytingu á vísitölu neysluverðs miðað við neysluverðsvísitölu 173,5 stig. Fullur barnalífeyrir greiðist ef árleg stig, áætluð í samræmi við grein 13.2. eru a.m.k. eitt stig. Séu áætluð stig færri, lækkar barnalífeyrir frá sjóðnum hlutfallslega og fellur niður ef árlegur stigafjöldi er minni en 0,5 stig.
- 14.3. Sama rétt öðlast börn og kjörbörn þeirra sjóðfélaga, er njóta örorkulífeyris úr sjóðnum, þó svo, að barnalífeyrir úr þessum sjóði skal vera jafnmargir hundradshlutar af fullum barnalífeyri og orkutap hans er metið.
- 14.4. Fósturbörn og stjúpbörn, sem sjóðfélagi hefur framfært að mestu eða öllu leyti, skulu eiga rétt á barnalífeyri. Skulu lífeyrisgreiðslur sjóðsins vegna slíkra barna vera hinar sömu og vera mundu, ef um börn eða kjörbörn væri að ræða.

15. gr.

Séreignardeild.

- 15.1. Séreignardeild lítur sömu stjórn og samtryggingardeild.
- 15.2. Til séreignardeildar er heimilt að greiða það framlag, sem greitt er umfram 10% af heildarlaunum. Jafnframt getur stjórn sjóðsins heimilað, að allir einstaklingar, er leggja stund á sjálfstæða starfsemi og ekki er skylt samkvæmt lögum að greiða 10% iðgjald til annars lífeyrissjóðs geti greitt 10% af heildarlaunum sínum til deildarinnar. Þá er stjórn sjóðsins einnig heimilt að veita viðtöku iðgjaldi frá einstaklingum, sem uppfylla lagaskyldu sína með greiðslum í annan lífeyrissjóð, en vilja greiða viðbótar-iðgjald til þessa sjóðs.
- 15.3. Þeir sem vilja greiða til séreignardeildarinnar skulu afhenda skrifstofu sjóðsins skriflega beiðni og felst í henni yfirlýsing um, að þeir vilji hlíta samþykktum sjóðsins.
- 15.4. Stjórn sjóðsins er heimilt að fenginni skriflegri beiðni einstakra sjóðfélaga að draga af inngreiddum iðgjöldum þeirra, upphæð, sem svarar til iðgjalds vegna líf- eða heilsu-tryggingar.
- 15.5. Færður er sérreikningur fyrir framlag hvers sjóðfélaga í séreignardeild. Á þennan reikning reiknast vextir og verðbætur og skulu þeir reiknast jafnháir meðalávöxtun sjóðsins. Í árslok skal draga frá séreigninni rekstrarkostnað skv. grein 6.1. í hlutfalli við séreignina í árslok.
- 15.6. Framlag í séreignardeild gefur ekki rétt til stiga eða fyrirfram ákveðins lífeyris heldur skulu greiðslur reiknast í samræmi við rétt hvers og eins.
- 15.7. Sjóðfélagi sem orðinn er 60 ára á rétt á að fá inneign sína greidda smám saman. Skal miðað við að innstæðan verði greidd með jöfnum árlegum greiðslum á eigi skemmri tíma en 10 árum. Sama rétt hefur sjóðfélagi, sem verður að hætta störfum vegna varanlegrar heilsubilunar, áður en hann nær 60 ára aldri.
- 15.8. Deyi sjóðfélagi fellur inneign hans í sjóðnum til eftirlifandi maka hans og ber að skipta með jöfnum greiðslum hluta hans á minnst 10 ár. Falli sjóðfélagi frá og skilji ekki eftir sig maka eða falli hann frá skiptist inneign sjóðfélaga eftir reglum erfðalaga um lögerfðir. Hluta barna, undir 18 ára aldri, ber að skipta með jöfnum greiðslum á 10 ár eða þau ár sem barnið vantar í 18 ára aldur, hvort sem lengra er.
- 15.9. Heimilt er stjórn sjóðsins að víkja frá fyrrgreindum reglum, ef inneign sjóðfélaga er svo lítil, eða árlegar greiðslur geta ekki náð eftirgreindum upphæðum.
 - a. Til sjóðfélagans 125% þess árgjalds, sem hann greiddi síðast í sjóðinn.
 - b. Til eftirlifandi maka 75% af árgjaldi því sem vísað er til undir a.
 - c. Til hvers barns 20% af árgjaldi því sem vísað er til undir a.

Í þeim tilfellum, sem talin eru undir stafliðum a-c, má stjórn sjóðsins dreifa greiðslum á skemmri tíma en 10 ár, en þó svo, að árlegar greiðslur fari ekki fram úr þeim upphæðum, sem þar eru taldar. Með jöfnum greiðslum er hér átt við jafnar greiðslur

að tiltölu við fjölda greiðsluára þannig að sjóðfélagi fái á hverju ári þann hluta af innstæðu sinni, að meðtöldum tekjum vegna hennar, sem svarar til þeirra ára er eftir standa af endurgreiðslutímanum.

16. gr.

Iðgjaldagreiðslur falla niður.

- 16.1. Nú falla niður launagreiðslur til sjóðfélaga vegna veikinda eða atvinnuleysis, og ávinnur hann sér þá ekki réttindi meðan svo stendur. Tímabil er iðgjaldagreiðslur hafa sannanlega fallið niður af þessum ástæðum, reiknast ekki með, þegar úrskurða skal hvort skilyrði um iðgjaldagreiðslutíma eru uppfyllt.
- 16.2. Falli iðgjaldagreiðslur niður í meira en 6 mánuði samfleytt af öðrum ástæðum en veikindum eða atvinnuleysi, telst hlutaðeigandi ekki lengur til sjóðfélaga. Skulu þá áunninn stig geymd nema krafist sé endurgreiðslu iðgjalda samkvæmt 17. gr.
- 16.3. Réttur til elli-, örorku- og makalífeyris fellur ekki niður, þótt sjóðfélagi hætti iðgjaldagreiðslu. Rétturinn miðast þá einungis við áunnin geymd stig sbr. þó 1. og 2. málsgrein þessarar greinar.
- 16.4. Sjóðfélagi sem átt hefur aðild að sjóðnum vegna árstíðarbundinnar vinnu telst sjóðfélagi, þótt iðgjaldagreiðslur falli niður í meira en 6 mánuði, hafi hann greitt iðgjöld tvö síðastliðin tímabil og stig hans þau tímabil séu a.m.k. 1,5. Fellur þá ekki niður réttur til örorku-, maka- og barnalífeyris.

17. gr.

Endurgreiðsla iðgjalda.

- 17.1. Af iðgjöldum sem sjóðnum eru greidd vegna starfsmanna sem náð hafa 70 ára aldri, sbr. grein 10.4., skal hann endurgreiða innborguð iðgjöld vegna launþega. Skal slík endurgreiðsla eiga sér stað eigi sjaldnar en einu sinni á ári.

18. gr.

Flutningur réttinda.

- 18.1. Gerist sjóðfélagi sem fer úr þessum lífeyrissjóði, sjóðfélagi í öðrum lífeyrissjóði, sem stofnaður er að lögum eða nýtur viðurkenningar fjármálaráðuneytisins, er stjórn sjóðsins heimilt að endurgreiða öll iðgjöld, sem greidd hafa verið hans vegna, með 4% vöxtum á ári. Sama gildir ef sjóðfélaginn kaupir sér lífeyri hjá tryggingafélagi eða stofnun, sem starfar eftir reglum, er fjármálaráðuneytið samþykkir. Það er skilyrði fyrir endurgreiðslunni, að hún gangi til kaupa á tryggingafélagi eða stofnun svo sem að framan greinir. Það skal ennfremur sett sem skilyrði fyrir endurgreiðslu samkvæmt þessari málsgr., að tilsvarendi takmarkanir gildi um endurgreiðslur eða endurkaup, þar sem réttindi eru leyfð, eins og eftir þessari reglugerð.
- 18.2. Fé sem yfirfært kann að vera úr öðrum lífeyrissjóði, veitir ekki víðtækari endurgreiðslurétt en gildir í sjóðnum sem það var yfirfært úr. Að öðru leyti setur stjórn sjóðsins um það reglur, að fengnum tillögum tryggingafræðings hans, með hvaða kjörum hún heimilar flutning réttinda úr öðrum sjóði til þessa sjóðs.

19. gr.

Samningur um gagnkvæm réttindi o.fl.

- 19.1. Heimilt er stjórn sjóðsins að gera samninga við aðra lífeyrissjóði um tilhögun réttindaflutnings o.fl. Í slíkum samningum má víkja frá biðtíma- og bótaákvæðum reglugerðar þessarar í því skyni að koma í veg fyrir niðurfall réttinda, þegar sjóðfélagi skiptir um starf, og tvítryggingu réttinda, sem ekki miðast við liðinn iðgjaldagreiðslutíma.

- 19.2. Ennfremur er þar heimilt að ákveða, að sjálfstæð réttindi í einstökum sjóðum skuli samanlagt ekki vera meiri en heildarréttindin mundu verða hjá einum og sama sjóði.

20. gr.

Tilhögun lífeyrisgreiðslna.

- 20.1. Lífeyrir greiðist mánaðarlega eftir á, í fyrsta sinn fyrir næsta mánuð eftir þann mánuð er lífeyrisréttur myndaðist og í síðasta sinn fyrir þann mánuð, er réttur lífeyris fellur úr gildi. Aldrei skal þó sjóðstjórn skylt að úrskurða lífeyri lengra aftur í tímann en tvö ár, reiknað frá byrjun þess mánaðar, er umsókn berst sjóðnum.
- 20.2. Nú nær lífeyrisgreiðsla ekki fjárhæð, er svarar til a.m.k. eins stigs réttinda, og fyrir-sjáanlegt er, að um sameiningu við önnur réttindi verði ekki að ræða, og er þá stjórn sjóðsins heimilt að inna greiðsluna af hendi í einu lagi samkvæmt reglum í samræmi við tillögur tryggingafræðings.
- 20.3. Hafi lífeyrisgreiðslu ekki verið vitjað í 5 ár, getur stjórn sjóðsins úrskurðað, að réttur til hennar falli niður, og rennur þá fjárhæðin til sjóðsins.

21. gr.

Heimild til skiptingar lífeyrisréttinda á milli hjóna eða sambúðaraðila.

- 21.1. Á grundvelli samkomulags sjóðfélaga og maka hans getur sjóðfélagi ákveðið skipan mála samkvæmt 1.-3. tölulið þessarar málsgreinar. Samkomulag þetta skal eftir því sem við á ná til ellilífeyrisgreiðslna, verðmætis ellilífeyrisréttinda eða ellilífeyris-réttinda beggja aðilanna og fela í sér gagnkvæma og jafna skiptingu áunninna réttinda meðan hjúskapur, óvígð sambúð eða staðfest samvist hefur staðið eða stendur:
1. Að ellilífeyrisgreiðslur sem renna eiga til hans skuli allt að hálfu renna til maka hans eða fyrrverandi maka. Viðkomandi lífeyrissjóður skal þá skipta greiðslum í samræmi við ákvörðun sjóðfélagsins, en þær falla niður við andlát hans. Deyi makinn eða fyrrverandi maki sem nýtur slíkra greiðslna hins vegar á undan sjóðfélaganum, skulu greiðslurnar allar renna til sjóðfélagsins.
 2. Í síðasta lagi 7 árum áður en taka lífeyris getur fyrst hafist og ef sjúkdómar eða heilsufar draga ekki úr lífslíkum, getur sjóðfélagi ákveðið að verðmæti uppsafnaðra ellilífeyrisréttinda hans skuli allt að hálfu renna til að mynda sjálfstæð ellilífeyris-réttindi fyrir maka hans eða fyrrverandi maka og skerðast þá réttindi sjóðfélagsins sem því nemur. Heildarskuldbinding lífeyrissjóðsins skal ekki aukast við þessa ákvörðun sjóðfélagsins.
 3. Að iðgjald vegna hans sem gengur til að mynda ellilífeyrisréttindi skuli allt að hálfu renna til þess að mynda sjálfstæðan rétt fyrir maka hans. Við ráðstöfun iðgjalds til lágmarkstryggingarverndar og viðbótartryggingarverndar skal litið svo á að iðgjaldsstofni sjóðfélagsins hafi verið skipt á milli hans og makans eins og iðgjaldinu.
- 21.2. Að öðru leyti en greinir í 21.1. að framan verður réttur til lífeyris hvorki af hendi látinn, né veðsettur.

22. gr.

Gerðardómur.

- 22.1. Rísi ágreiningur út af reglugerð þessari, skal skjóta málinu til gerðardóms, er skipaður skal þremur mönnum, einum tilnefndum af stjórn sjóðsins, einum af þeim aðila sem ágreining gerir og oddamanni, sem dómstjóri héraðsdóms Reykjavíkur tilnefnir.

23. gr.

Samningar við tryggingarfélag um líf- eða heilsutryggingar.

Stjórn sjóðsins er heimilt að semja við tryggingarfélag um líf- eða heilsutryggingar fyrir einstaka hópa sjóðfélaga, enda komi til sérstakt iðgjald vegna tryggingarinnar og greiðslu kostnaðar, sem til kann að falla vegna hennar, þannig að slík þjónusta greiðist ekki af 10% skylduiðgjaldi sjóðfélaga.

24. gr.

Breytingar á reglugerðinni.

- 24.1. Tillögur um breytingar á reglugerð þessari verða að hafa borist stjórn sjóðsins a.m.k. fjórum vikum fyrir ársfund (aukaársfund) skv. 5. gr. Hafi tillögur til breytinga á reglugerð sjóðsins áhrif til aukningar eða skerðingar á réttindum sjóðfélaga skal fylgja þeim tryggingarfræðileg úttekt á áhrifum breytingarinnar á gjaldhæfi sjóðsins. Tillögur til breytinga á reglugerð skulu liggja frammi á skrifstofu sjóðsins viku fyrir ársfund.
- 24.2. Reglugerðarbreytingar taka aðeins gildi ef þær hljóta samþykki a.m.k. 2/3 hluta fundarmanna og hafa hlotið staðfestingu fjármálaráðuneytis.

25. gr.

Gildistaka.

- 25.1. Reglugerð þessi tekur gildi 30. júní 1998.

Með tilvísun til laga nr. 55/1980 staðfestist reglugerð þessi hér með.

Fjármálaráðuneytinu, 30. júní 1998.

F. h. r.

Áslaug Guðjónsdóttir.

Margrét Gunnlaugsdóttir.

AUGLÝSING

um breytt deiliskipulag á Egilsstöðum.

Á fundi bæjarstjórnar Austur-Héraðs 6. október 1998 var samþykkt tillaga að breyttu deiliskipulagi á Egilsstöðum við Fagradalsbraut 21-27. Í breytingunni felst að þrem lóðum, nr. 21, 23 og 25 er breytt í tvær lóðir; önnur nr. 21-23 og hin nr. 25-27, ásamt því að tenging við Kelduskóga breytist. Lóðamörk breytast jafnframt.

Tillagan var auglýst skv. 18. gr. skipulags- og byggingarlaga nr. 73/1997 frá 29. maí til 29. júní 1998, yfirfarin af Skipulagsstofnun og staðfest skv. 3. mgr. 25. gr. sömu laga.

Deiliskipulagið tekur þegar gildi.

Egilsstöðum, 7. október 1998.

Guðmundur Pálsson bæjartæknifræðingur.